

Parmelin appellescha a la fidanza

Cusseglie federal Guy Parmelin al solver da purs sin il bain Plankis a Cuira

DA MARTIN CABALZAR/FMR

■ Il di da la Festa naziunala ha cusseglier federal Guy Parmelin prendi part dal brunch da la fundaziun Plankis a Cuira. Là è el s'incuntrà cun represchents da l'Uniu purila grischuna e cun intgins politichers grischuns. La saira ha il magistrat federal tegnì ses pled festiv a Cavione en il Puschlav.

Curt avant las 10.00 è cusseglier federal Guy Parmelin, flancà da ses salter en ornat uffizial e sia cussegliadra persunala, sa tschentà cun ses helicoter sin il Rossboden a Cuira. El è vegnì nà dal Tessin nua ch'el passenta intgins dis da vacanzas. Cun bus è el alura vegnì conduì sin il bain puril da Plankis nua ch'el è vegnì retschavì dals tuns d'ina tiba d'alp sunada da Rainer Schilling. Il bainvegni en num da l'Uniu purila grischuna ha fatg ses parsura Thomas Roffler surdond in chanaster cun products agrars dal Grischun. Da la partida eran er il minister d'economia grischun, cusseglier guvernativ Marcus Caduff, il parsura dal cussegl grond Alessandro Della Vedova, la cussegliera naziunala Magdalena Martullo e l'ant. cusseglier naziunali Duri Campell. La delegaziun è ladinamain sa rendida al solver puril offrì en la stallas dal bain puril Plankis nua ch'ella è vegnida retschavida musicalmain da la chapel da musica populara Cadetg.

In curt pled festiv

Cun in curt pled festiv è Parmelin sa drizzà a la raspada a Plankis, quest onn naturalmain main numerusa ch'auters onns pervi da las mesiras da corona. In grond laud ha il maigstrat drizzà a la fundaziun Plankis per ses manaschi e per ses engaschament exemplaric per l'integrasiun da persunas handicapadas e main favurizadas da nossa societad. Sco minister d'econo-



Ils represchents da l'Uniu purila grischuna han nizzegià l'ocasiun da metter a cor a «lur» minister d'agricultura ils basegns e quists dals purs grischuns.

FOTO MARTIN CABALZAR

mia ha el accentuà la rolla impurtanta da l'agricultura per il provediment da la populaziun cun vivonda sauna e natirala, dentant era per mantegnair la cuntrada e las valurs tradiziunals da noss pajais. La crisa da corona haja plinavant demonstrà quant impurtanta che la fidanza in da l'auter saja, quai tant en l'economia sco en la politica. «La fidanza è il motor da noss futur», ha accentuà Parmelin. I saja impurtant che la populaziun haja fidanza e confidenza en la politica, en il medem mument stoppia er la politica pudair sa fidar da la populaziun. «Fidanza e confidenza tegnan ensemen noss pajais, quai ha la crisa da corona demussà danovamain e cun tutta evidenza», ha concludì Parmelin.

En discurs cun ils purs

Sco organisaziun ospitanta ha la supranza da l'Uniu purila grischuna nizzegià l'ocasiun da render attent il minister d'agricultura ed anteriur viticultur Parmelin als problems specifics da l'agricultura da muntogna en general e da l'agricultura grischuna en spezial. Sco quai ch'il parsura Roffler ha tradì a la FMR è naturalmain er las attatgas da las bestgas rapazzas sin animals da niz e las difficultads supplementaras per l'alpeggiun vegnidas tematisadas. Tranter auter er en discurs direct cun ils dus purs lumnezians Silvan Caduff e Paul Caduff ch'eran da la partida. En quest connex

spera er il minister d'agricultura ch'i dettia in gea a la revisiun da la lescha da chatscha la fin settember. Quella possia mitigiar almain in zichel la situaziun.

Ulteriurs temas ch'èn vegnids ventilads dals purs grischuns èn stads tenor Roffler: Las tractativas per il commerzi liber e la protecziun dals products agrars al cunfin, ils standards da qualitat per products importads, las midadas da structura en l'agricultura, las chadainas regionalas per il retgav da valor, la lavur administrativa creschenta, il svilup dals pajaments directs, la segirezza sociala da las famiglias purilas, la reducziun dals pestizids e la furnaziun e perfecziun futura dals purs etc.